

SEKTOR OSIGURANJA BOSNE I HERCEGOVINE

Zaključno sa 31. 12. 2021. godine, u sektoru osiguranja Bosne i Hercegovine poslovalo je 25 društava za osiguranje i jedno društvo za reosiguranje sa sjedištem u Federaciji Bosne i Hercegovine. Od 25 društava za osiguranje, 16 društava se bavilo isključivo neživotnim osiguranjem, dok su ostalih devet društava bila aktivna u poslovima i životnog i neživotnog osiguranja.

Prema prikupljenim preliminarnim podacima, ukupna bruto zaračunata premija u sektoru osiguranja Bosne i Hercegovine u 2021. godini je iznosila 818.403.122 KM, što je povećanje za 8,27% u odnosu na premiju u 2020. godinu koja je iznosila 755.894.108 KM. Premija životnog osiguranja u 2021. godini je iznosila 174.794.669 KM, što je povećanje za 11,77% u odnosu na premiju u 2020. godini koja je iznosila 156.385.665. Premija neživotnog osiguranja u 2021. godini je iznosila 643.608.453 KM, što je povećanje za 7,36% u odnosu na premiju u 2020. godinu koja je iznosila 599.508.443 KM. Premija životnog osiguranja u 2021. godini je imala udjel u ukupnoj premiji od 21,36%, dok je premija neživotnog osiguranja imala udjel u ukupnoj premiji od 78,64%.

U 2020. godini u odnosu na 2019. godinu, kao posljedica pojave pandemije izazvane virusnim oboljenjem COVID-19, premija životnog osiguranja se smanjila za 1,29%, premija neživotnog osiguranja se smanjila za 0,80%, dok se premija životnog i neživotnog osiguranja smanjila za 0,90%.

Ukoliko se posmatra struktura ukupne bruto zaračunate premije u sektoru osiguranja Bosne i Hercegovine u 2021. godini, najveći udio ima osiguranje od odgovornosti za upotrebu motornih vozila (49,96%). Zatim slijede životna osiguranja sa udjelom od 21,36%, osiguranje cestovnih vozila sa udjelom od 9,73%, osiguranje od nezgoda sa udjelom od 6,18%, osiguranje od požara i elementarnih nepogoda sa udjelom od 4,06%, ostala osiguranja imovine sa udjelom od 3,64%, ostala osiguranja sa udjelom od 3,63%, i na kraju zdravstveno osiguranje sa udjelom od 1,44%.

Na tržištu životnog osiguranja u 2021. godini, dominantno društvo je Uniqa osiguranje d.d. sa ostvarenom premijom od 40.560.298 KM i tržišnim učešćem od 23,20% u premiji životnog osiguranja. Tržišni udio prvih pet društava na tržištu životnog osiguranja u 2021. godini iznosi 90,71%. Na tržištu neživotnog osiguranja u 2021. godini, dominantno društvo je Adriatic osiguranje d.d. sa ostvarenom premijom od 68.033.842 KM i tržišnim učešćem od 10,57% u premiji neživotnog osiguranja. Tržišni udio prvih pet društava na tržištu neživotnog osiguranja u 2021. godini iznosi 44,06%. Na tržištu životnog i neživotnog osiguranja u 2021. godini, dominantno društvo je također Adriatic osiguranje d.d. sa ostvarenom premijom od 74.321.317 KM i tržišnim učešćem od 9,08% u premiji životnog i neživotnog osiguranja.

Tržišni udio prvih pet društava na tržištu životnog i neživotnog osiguranja u 2021. godini iznosi 40,88%.

U toku 2020. godine u BiH su usvojena dva zakona u oblasti obaveznog osiguranja u saobraćaju: Zakon o izmjenama i dopunama zakona o obaveznim osiguranjima u saobraćaju („Službeni glasnik Republike Srpske“, broj 78/20) i Zakon o obaveznim osiguranjima u prometu („Službene novine Federacije BiH“, broj 57/20). U 2021. godini usvojen je Zakon o izmjeni i dopuni Zakona u osiguranju Federacije Bosne i Hercegovine („Službene novine Federacije BiH“, broj 103/21). U okviru formirane radne grupe u Agenciji za osiguranje u Bosni i Hercegovini provedene su aktivnosti na izradi Analize o usaglašenosti zakona o osiguranju Federacije Bosne i Hercegovine i Republike Srpske.

U 2020. godini predstavnici Agencije za osiguranje u Bosni Hercegovini su učestvovali u radu šest radnih grupa za evropske integracije, odnosno u radnim grupama za finansijske usluge, statistiku, pravo poslovnog nastana i slobodu pružanja usluga, slobodno kretanje kapitala, ekonomske kriterijume i ekonomsku i monetarnu politiku. U okviru navedenih radnih grupa odvijale su se pripreme aktivnosti za novi Instrument pretprijetne pomoći EU za period 2021-2027 (IPA III), te su započete aktivnosti na izradi Programa integrisanja Bosne i Hercegovine koje će biti nastavljene i tokom 2021. godine.

U okviru aktivnosti vezanih za međunarodnu saradnju u 2020. godini, predstavnici Agencije za osiguranje u Bosni Hercegovini su učestvovali na različitim međunarodnim sastancima, konferencijama i regionalnim forumima iz oblasti osiguranja, u online formatu. Krajem 2020. godine, Vijeće ministara Bosne i Hercegovine je imenovalo novi saziv Upravnog odbora Agencije za osiguranje u Bosni i Hercegovini, sa mandatom od tri godine.

Agencija za osiguranje u Bosni i Hercegovini

*Direktorica
Emina Jahić*